



Nuuk ulloq 19. septembari - 2018

Inatsisartut Suleriaasianni § 37 imm. 1 naapertorlugu Naalackersuisunut apeqquq imaattoq matumuuna saqqummiuppara:

**Naalackersuisunut apeqqutit:**

1. Ikiorneqassagaanni qanoq utaqqitigisariaqarpa, tarnip pissusaatigut aamma tarnip nappaataatigut, Tasiilami nunaqarfiinilu eqqarsaatigalugit meeqqat inuusuttullu 30-t tungaanut ukiullit ima misigisaqarsimasut:

A) Imminut toqunnissaminnut ulorianartorsiortut/imminut toqoriarsimasut. B) Paasineqartillugu angerlarsimaffiminni sumiginnarneqarsimasut. C) atonerluisut katsorsarneqartarfiini. D) Angerlarsimaffimmi persuttaasoqarsimatillugu?

2. Tasiilami meeqqat inuusuttullu sunngiffiminni sunik periarfissaqarpat sualummik unnukkut aamma sapaatip akunnerata naanerani?

3. Meeqqanut inuusuttunullu ornittakkanik sunik peqarpa kiisalu Tasiilami nunaqarfiinilu inuusuttunut inersimasunullu ornittakkanik soqarpa?

4. Tasiilami inunnik isumaginninnermi atorfiit aalajangersimasunik inuttalernerqarsinnaanngitsut eqqarsaatigalugit nooqattaarnissamut aqqissuussinersit suut piuppat?

5. Ajoqersuussinissamut taamatullu inunnik isumaginninnermut allaffinni, peqqinnissaqarfimmilu sulisut ilinniarsimasut immersoqatigiittarnissaannut kiisalu inunnik isumaginninnermut siunnersortit allallut ajornartorsiortunik sullissisut imaluunniit Tasiilami eqqaanilu sakkortuumik aqquusaagaqarsimasunut sullissisut eqqarsaatigalugit Naalackersuisut sunik periarfissaqartitsippat?  
- Naalackersuisut periarfissanik allanik ilisimasaqarnerlutik?

6. Naalackersuisut pilersaaruteqarnerlutik Tasiilami inuusuttut/kulturip illuanik pilersitsinissaminnut? Taamaassimappat qaqugu sananeqassava?

7. Nunami maani piaaraluni Ilaqutariinnut Sullisivinni avataaneersunik atorfinitsitsisoqartarpa tamanna pisariaqartutut isigineqartillugu, taamaasilluni nunaqavissut avataaneersullu akuleriilluartut najukkamili inuit attaviittut atorneqanngitsut pigiumallugit?

8. Qulaani apeqqutinut tunngasunik soqutiginaatilinnik allanik Naalackersuisut paasissutissiisinnaappat?

**Tunngavilersuut:**

Soqutiginassaaq paasissallugu Tasiilami eqqaanilu sunngiffimmi neqeroorutit suut aallartinneqalernersut. Nammineq toqoriartarneq, atonerluineq allallu inuttut ajornartorsiutit atuupput soorlu aamma nunap sinnerani taamaattoq.

Tunu ungasissorujussuartut misinnarsinnaasarmat kiisalu TELE-medicinimut qarasaasiakkut pitsaasumik attavilersungaangimmat il.il. ernummatigisinnaavarput puigorneqarsinnaanera imminiiginnarneqarsinnaaneralu. Sulisut ilinniarsimasut, meeqqat inuusuttullu kiisalu Tunumi Tasiilami innuttaasut sanngiitsut eqqarsaatigalugit.



**SULEQATIGIISITSISUT  
SAMARBEJDSPARTIET**

Aamma soqutiginarpoq tusassallugu meeqqat inuusuttullu, allaat inuusuttut inersimasullu sumunngarfissaqartarnersut toqqissiviilliuleraangamik aamma toqqissisimaffigisinnaasaminnik amingaateqaleraangamik angerlarsimaffimmi perullulioritoqarsimatillugu. Taamaattumik kissaatiginarpoq ornittakkat killiffiat tusarfigissallugu.

Aamma paasivarput sunngiffimmi neqerooruteqarpiangitsoq, sualummik unnukkut aamma sapaatip akunnerata naanerani, taamaattumik soqutiginassaaq tusassallugu Naalakkersuisut tamatumunnga ikiorsiinissaminnut pilersaaruteqarnersut.

Naggataatigut Suleqatigiissitsisuni eqqarsaatigaarput naapertuutissanersooq najukkami najugaqareersunik sulisussarsisarnissaq aammali nunaqavissut avataaneersullu akuleriiaarluarnissaat aporfeqannginnerunissamut aqquataasinnaasarmat soorlu Ilaqutariinnut sullissivinni, tamakkunani sulineq ersinermik nassaqsinnaasarmat imaluunniit ileqqorissaarnissakkut- aamma aalajangeeqataasinnaassutsikkut ajornartorsiutitaqarsinnaasarmat.

Taamaasilluni ilaannikkut avataaneersunik sulisussarsisarneq iluaqutaasinnaasarpoq, isumassarsititsisarmata aammali avatangiisinut inuuffigiligassaminnut allaanerusunik isumaqartartamata taamaakkaluartorli inunnik isumaginninnikkut suliniutinik aallarniisinnaasarlutik eqqarsaatit nutaat pigalugit suleqatigalugilli najukkaminnut sutigut tamatigut ilisimasaqarluartut.

Apeqqutit akeqquneqarput ullut sulliviit naliginnaasut qulit qaangiutsinnagit.

Tillie Martinussen  
Samarbejdspartiet - Suleqatigiissitsisut